

Headlines

1. उपराज्यपाल मनोज सिन्हा होरें अज्ज राश्ट्री खेड्ड दिवस पर हॉकी दे म्हान खड्डारी मेजर ध्यानचंद होरें'गी श्रद्धांजलि अर्पित कीती। उ'नें आखेआ जे खेड्डां गै नौजवानें लेई जीवन च सबनें शा इमानदार गुरु न।
2. छात्तरू च नाबालिग कुडी दी हत्तेआ आहले मामले च पुलसै इक होर आरोपी गी गिरफ्तार कीता ऐ। हिरासत च लैते गेदे आरोपिएं दी गिनतरी 6 होई गई ऐ।
3. केन्द्री राज्यमंत्री डाक्टर जीतेन्द्र सिंह होरें आखेआ ऐ जे जम्मू-श्रीनगर रूट पर त्रीऽ बंदे भारत रेल तौले चलगा। रेलवे डिवीजन ने लोकें दी भारी मंग दे चलदे इस ट्रेन गी उधमपुर स्टेशन पर रोकने दी मंजूरी दिती।
4. उत्तर रेलवे दे जम्मू डिवीजन ने अज्जै थमां बडगाम ते कटड़ा बश्कार रेल सेवा परतियै शुरु करी दिती ऐ।
5. मौसम विभाग ने जम्मू-कश्मीर च अगले 10एं दिनें दरान मौसम गर्म ते उमस भरोचा रौहने ते टामीं-टामीं थाहरें पर हौली बरखा ते गरज-चमक दी पेशगोई कीती ऐ।

<><><><><><>

LG Sports Day

उपराज्यपाल मनोज सिन्हा होरें अज्ज खेड्डें सरबन्धी राश्ट्री ध्याड़े दे मौके उप्पर हाकी दे जादूगर खोआने आहले मेजर ध्यानचंद होरें'गी श्रद्धांजलि अर्पित कीती ऐ। श्रीनगर च लोआए गेदे इक कार्यक्रमै दरान किट्ट अगगे भाशण दिंदे होई एल.जी होरें आखेआ जे खेड्डां गै व्यक्ति दे जीवन दी सबनें शा ईमानदारी गुरु होंदिआं न जेहिडियां उ'दे अंदर अनुशासन, एकता, सबर ते राश्ट्र निर्माण ज्जेही भावनाएं दा संचार करदिआं न। उ'नें आखेआ जे सेहतमंद, निडर ते खेड्डें दे खेत्तर च अगुवा भारत गै इक म्हान ते ताकतवर राश्ट्र दी बुनियाद ऐ। श्री सिन्हा होरें कारपोरेट घरानें गी गुजारश कीती जे ओहू हुनर दी पन्थान आहले चरण थमां गै खड्डारिएं दी मदद करन। उ'नें नौजवानें दा बी आह्वान कीता जे ओहू पूरे सम्मान दे कन्नै मुकाबले खेड्डन ते जेगर हार दा सामना बी करना पवै तां उसी बी पेशेवर ते गरिमापूर्ण ढंग्गै कन्नै स्वीकार करन। एल.जी होरें

नशा मुक्त अभियान च शमूलियत लेई नौजवानें दी सराहना कीती ते आखेआ जे उ'नें समूलचे राष्ट्र दे अगो इक मिसाल पेश कीती ऐ।

<><><><><><>

Chatroo Case

किश्तवाड़ जिले दे छात्तरू इलाके च इक नाबालिग कुडी दी हत्तेआ दे मामले च जारी जांच दे चलदे पुलसै इक होर व्यक्ति गी गिरफ्तार कीता ऐ जेह्दे करी इस मामले च हिरासत च लैते गेदे व्यक्तिएं दी गिनतरी बधियै 6 होई गेई ऐ। पुलसै इस मामले च जिला अस्पताल किश्तवाड़ च बतौर नर्स अपनी सेवा देआ करदी सोनिया परिहार गी गिरफ्तार कीता ऐ। इस मामले दी जांच किश्तवाड़ दे एस.एस.पी हुं'दी अगुवाई च खडेरी गेदी इक बशेश जांच टीम आसेआ कीती जा'रदी ऐ। पुलसै आखेआ ऐ जे जांच दरान यौन उत्पीड़न, गर्भ अवस्था ते होर बी दुए आरोप सामने आए न ते इ'नें मामलें च केई सारे व्यक्ति दी शमूलियत दस्सी जा'रदी ऐ। आरोपिणं च कुडी दे डाक्टरी इलाज कन्नै जुड़े दे लोक बी शामिल ना। बशेश जांच टीम दा आखना ऐ जे जांच बरोबर जारी ऐ ते सबूतें दी बिनाहू उप्पर गै अगो दी कार्रवाई गी अंजाम दित्ता जाह्ग।

<><><><><><>

Jitendra – Vande Bharat

केंद्री राज्यमंत्री डाक्टर जितेंद्र सिंह होरें आखेआ ऐ जे जम्मू ते श्रीनगर बश्कार त्री वंदे भारत रेल गड्डी तौले गै शुरू कीती जाह्ग। उ'नें इस रेल सेवा गी जम्मू-कश्मीर दे लोकें दे विकास आस्तै महत्वपूर्ण करार दित्ता ऐ। इक वीडियो स्नेहू च डाक्टर सिंह होरें आखेआ जे रेल मंत्रालय ने उधमपुर स्टेशन पर एहू रेल गड्डी रोकने गी मंजूरी देई दित्ती ऐ। मंत्री होरें रियासी च चनांस दरेया उप्पर दुनिया दा सबनें शा उच्चा रेल पुल बनाने गी इंजीनियरिंग दी इक बड्डी उपलब्धि दस्सेआ। उ'नें प्रधानमंत्री नरेंद्र मोदी ते रेल मंत्री हुं'दा धन्नवाद बी कीता। जितेंद्र सिंह होरें आखेआ जे रेल जात्तरा पर्यटकें आस्तै आकर्षण दा केंद्र ऐ कीजे बड्डी तादाद च यात्रु जम्मू थमां श्रीनगर दे रेल गड्डी दे सफर दे दरान मनभाने नजारें दा नंद ठोआंदे ना।

<><><><><><>

Chhari Mubarak Return

भगवान शिव दी पवित्तर छड़ी मुबारक दे श्री दशनामी अखाड़ा पुज्जने दे कन्नै गै पुंछ च श्री बुढ़ा अमरनाथ जी दी सलाना जात्तरा संपन्न होई गई ऐ। एह्दे शा पैहले पवित्तर छड़ी मुबारक गी त्र'उं दिनें धोड़ी श्री बुढ़ा अमरनाथ जी दे मंदरै च रक्खेआ गेआ हा। बम बम भोले ते हर हर महादेव दे जयकारें दे कन्नै स्वामी विश्वात्मानंद सरस्वती जी हुं'दी अगुवाई च कड़े गेदे धार्मिक जलुस च ज्हारां बद्धे श्रद्धालुएं ते साधुएं हिस्सा लैता। दशनामी अखाड़ा पुज्जने पर पवित्तर छड़ी मुबारक दा निग्गा सुआगत कीता गेआ ते इस मौके उप्पर उत्थे पारंपरिक विधि-विधान दे कन्नै पूजा ते आरती बी कीती गई। इस मौके उप्पर इक सामुदायिक लंगर दा सरिस्ता बी कीता गेदा हा।

<><><><><><>

Budgam –Katra Train

उत्तर रेलवे दे जम्मू डिवीजन नै अज्जै थमां बडगाम ते कटड़ा बश्कार रेल सेवा परतियै शुरु करी दिती ऐ। श्री माता वैष्णो देवी दे यात्रिएं ते श्रद्धालुएं गी ध्यानै च रखदे होई उत्तर रेलवे दे जम्मू डिवीजन नै एह बड्डा फैसला लैता ऐ। अज्ज बडगाम थमां रेल नम्बर 04688 बड्डुलै 7 बज्जियै 20एं मिन्टें पर कटड़ा लेई रवाना होई ते ओह दपैहरी इक बजे श्री माता वैष्णो देवी कटड़ा रेलवे स्टेशन पुज्जी। जम्मू रेल डिवीजन नै सोशल मीडिया पोस्ट राएं एह जानकारी दिंदे होई आखेआ जे एह रेलगड्डी अज्जै थमां अपने नियमित रुट पर चला करोग।

<><><><><><>

PM Mann ki Baat

प्रधानमंत्री नरेन्द्र मोदी होर कल ऐतावारें दिने 11 बजे आकाशवाणी पर अपने “मन की बात” कार्यक्रम राएं देश-विदेश दे लोकें कन्नै विचार सांझे करगंन। हर महीने दे खीरले ऐतवारें प्रसारत होने आहले इस कार्यक्रम दी एह 137मीं किश्त होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाइट ते न्यूज ऑन ए.आई.आर mobile app- सनें डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। आकाशवाणी जम्मू आसेया हिंदी प्रसारण दे बाद एहदा डोगरी भाशा च अनुवाद प्रसारित कीता जाह्ग।

Solar Panel –Udhampur

जम्मू-कश्मीर च पैहली सितम्बर थमां बिजली दी दरे औसतन 6 इशारिया 83 फीसद दी बढौतरी होने दे चलदे बिजली उपभोक्ता हून अपने म्हीने दे बिजली बिल गी घट्ट करने दे तौर-तरीके दी तलाश करा'रदे न। उधमपुर च लोक घरें दी छत्ते पर सोलर पैनल सिस्टम लाने च मती दिलचस्पी दस्सा'रदे न। बिजली दी बधदी कीमतें कारण उपभोक्ताएं च बिजली दे वैकल्पिक स्रोत दे तौर पर सौर ऊर्जा दे बारे च मती जागरुकता पैदा होई ऐ। उधमपुर दे केंई घरे- जिनें पैहले थमा गै छत्ते पर सोलर सिस्टम लाए दे न- दा आखना ऐ जे उन्दे बिजली दे बिलें च बड़ी मती कमी आई ऐ ते हून एह तकरीबन सिफर ऐ।

<><><><><><>

JK Weather

मौसम विभाग नै जम्मू-कश्मीर च अगले 10 दिनें तगर आमतौरा पर गर्म ते उमस भरोचै मौसम कन्नै किश थाहरें पर हलकी बरखा बरने दी पेशनगोई कीती दी ऐ। आकाशवाणी दे जम्मू संवाददाता नै जानकारी दिती ऐ जे मैहकमे दा आखना ऐ जे अज्जै थमां लेइयै कल 30 अगस्त तगर टांवी-टांवी थाहरें पर बड्डलै- सवेले जां दपैहरी'लै गर्ज-चमक कन्नै हल्की बरखा बरी सकदी ऐ ते फही 31 अगस्त ते पैहली सितम्बर गी किश थाहरें पर चानचक्क हाड़ औने ते ल्हास-पस्सियां पौने दी शेंका जाहिर कीती ऐ। करसानें गी मौसम सरबन्धी परामर्श गी ध्यानै च रखदे होई गै बाड्डी ते होर दुए राई-बाई सरबन्धी कम्में गी जारी रखने दी सलाह दिती गेई ऐ।

<><><><><><>